

Iakobo **Iakobo'a Mirihirote'e So'ağa** **Ihore Ġoe'a**

So'a 'ahi'e Iesu negoğa 'ahoga, Iakobo'a haba'ahaba'ano rovote radiunute'e ekalesiağa ġehağa veize mirihiro. Iakobo'e Ierusalema ekalesia ibitozirote'e vazega boro. So'a 'ahi zamağano ani'e ekalesia azağani'a ġaboneze zamağano nougenouge radite'e moneo ihoziro. Ebu mene fie'ete'e da'o, rehano hağai manoga zuni hağae huno'i rae riğa goeriro.

¹ Ege, Iakobo'e Badi'a zu Zuhi'a Boro Iesu Keriso tuğure vazega. Ege'a haba'ahaba'ano rovote radiu'ete'e ekalesia azağa, urabo nidu'a gaubanana aheu fare* veize so'a 'ahi mirihe'ohe.

Fie'ete'e zu Zamarone Huhuzağa

² Ege nego nabudi, za aduga nunu hido'idene, e'e u'ano matu'e rudano'i.

³ Mazağa za edeğa, za'a fie'eta'a'e Badi'a'a tuhune nurine, zamaze ufeta obone gigani'uma.

⁴ E'ano'o za aduga nunu zamağano zamaze obone gigano'i onamo ġonaga. 'Ougine, za ġau 'ahogani'a mene ferezadu fie'eta'a'e ufeta ġuhuri'uma zu ve'oğani 'ahoga'e zae mazao o'o'a re'uma.

⁵ Zae bo'ağano iniu zamarone huhuzağani'a fereno'idene, Badi'a umino'i. 'Ougine Badi'a'a

* **1:1 1:1** *Badi'a mone azağa nidu'a*

ha'uma. Badi'a'e zae umino borofe zini'ohe ebu za mene roze'ohe.

⁶ Rehano umido'idene, Badi'a mazao fie'ena'a, ago zamare 'ada'ado'i. Mazağa zamare 'ada'ade'ete'e vazega'e zavara'a davara sa'uğa hodadu sa'u'a owoe ite'ete'e heuğa.

⁷⁻⁸ E'e vazega zama'e aheu radu hağaiğa nidu'a'e ġihugihuğa. E'ano'o Zuhi'a Boro mazono'o ġauni 'ahoga hidi'uma rae mene zamari'uma.

Zahara zu Ma'ora

⁹ Zahara ekalesia azağa'e Badi'a'a nize mae ġihinine, matu'e huni'uma.

¹⁰ U ma'ora azağa'e Badi'a'a nize mae ovoine, matu'e huni'uma. Mazağa ze'e butu kakağa teige dauġi'uma.

¹¹ Mada'a itadu agaru hiau'etene, rahao ġuhure'ete'e ġauğa nidu'a'e rorau'ohe, ebu kakağa'e rururanadu irağa manoga'e hauġe'ohe. E'e teige, ma'ora azağa zuni gauze inare hağae'ete'e zamağano ruda'uma.

Aduga zamağano Zamaze Obone Gigano'i

¹² Aduga zamağano zamaze obone gigan'e'ete'e vazega'e matu'e'ohe. Mazağa ani'e Badi'a'a tuhune nurrote'e zamağano edau gigararo 'ahine, kini vadini adiriga hidadu ġabone hidi'uma. A'e Badi'a'a iniu ani zamare'ete'e azağa teite goitorrote'e ġoe'a.

¹³ Aduga hide'ete'e zamağano hağai sau'a hağaihi rae ra'ete'e zamaroneğa mo'idene, "Badi'a'a e tuhuhe nure'ohe," rae ago ro'i. Mazağa sau'a ġauğani'a Badi'a tuhune nuroga'e

mene idağa, zu Badi'a'e ane'a bare vase 'ahoga mene tuhune nure'ohe.

¹⁴ Rehano vase tibatiba zamağani'a hağai sau'a hağaoga urate rudanadu zamarone sau'a 'uguğani'a zamağa au'ohe ebu 'ahirine'ohe. E'e u'ano ani'a hağai sau'a ibiğano diuğihi ra'ohe.

¹⁵ Hağai sau'a hağaoga ufeta uratine, a'e hağai sau'ani'a isiheta teigadu hağai sau'a furene'ohe. Ebu hağai sau'ani'a ğuhure bororu'etene, rune furene'ohe.

¹⁶ Ege zamarone nego nabudi, zama kauriğa ago mo'i.

¹⁷ Ğahunone manomano zu duduğa nidu'a'e adureo emege Mama Badi'a mazaono'o are'ohe. Badi'a'a adure agağa nidu'a hağairo. Adure agağa nidu'a'e iğaiğa mene agaru'ohe zu mada nu'e nufe'ohe. Rehano Badi'a'e mene hune nufadu ğauni 'ahoga mene mae uzaboni'ohe.

¹⁸ Ani'e ane urao eme ohotadu ğoere huga hina eme'e ane ubugaubugano hufiro. 'Ougadu eme'e Badi'a'a hağairote'e ğauğa nidu'a bo'ağano hirivirote'e ogomuğa ibi'a manoga teigiro.

Igi'ete'e zu Hağae'ete'e

¹⁹ Ege zamarone nego nabudi, 'ahi faine edero'i: Vaze nidu'a ğoere ğarihe igi'uma, faine zamaradu ğoeri'uma, ebu mene ğarihe mağuni'uma.

²⁰ Mazağa mağune'ete'e vazega'e Badi'a'a urate'ete'e hağaiğa duduğa hağaoga'e mene idağa.

²¹ E'ano'o hağai toraga nidu'a zu hağai sau'a nidu'a mae modo'i. Nize mae ovoe'ena'a,

Badi'a'a zamazeo ġorarote'e ġoe'a mae ġihino'i. Ġoere e'e'a zae ġabozoga'e idaġa.

²² Badi'a ġoere ago igi modo'i, rehano ego-hano'i. Igi mode'ete'e vazegħa'e kaurikaure haġadu ane'a bare so'one'ete'e heuġa.

²³ Badi'a ġoere egadu mene haġae'ete'e vazegħa'e veġia hina iraġa ġiane tauġe'ete'e heuġa.

²⁴ Ani'e veġia hina iraġa ġianate'e enogano mode onamadu iraġa nagiga'e zogone aġutu'ohe.

²⁵ Rehano iniu'a ve'oġa o'o'a zu haġaize sau'anono'o bohaze buze'ete'e goroġa ġoe'a faifaine ġianadu e'e goro ġoe'a idunaġano 'aune haġae'ete'e vazegħa'e, goro ġoe'a egadu mene aġutu mode'ete'e vazegħa, ebu e'e hegote haġae'ete'e vazegħa. 'Uguġa vazegħa'e ani nagini haġae'ete'e zamaġano manohuga hidi'uma.

²⁶ Vaze 'ahoga'e ane'a bare Badi'a mazao faine kurau'ohe rae zamare'ohe. Rehano mene faine zamare'ena'a, ane mazane'a ġoere tauġitaugħine, ani'e kaurikaure haġadu Badi'a mazao kurau'ete'e zuni huga o'o'a.

²⁷ Badi'a emeġe Mama ubumao deheġa zu tor-aga o'o'ano kurau'eta'a'e nagiga? A'e butu ega zu ġozoba'a aduga hide'etene, danaze hune'ete'e ebu raha toraganono'o vaġinadu emeġe'a bare obofe gigafe'ete'e ra'ohe.

2

Vaze mazao Ago Inaho'i

¹ Eḡe nego nabudi, za'e emeḡe Zuhi'a Boro Iesu Keriso ḡihi'a hune mazao fie'ete'e azaḡa, e'ano'o vase mazao ago inaho'i.

² 'Ahige zamare nuro'i. Zae nu'onu'o neḡano vase 'ahogani'a dabua duhuḡa zu iniamau goloḡa vidanadu diuḡe'ohe, ebu zahara vaseḡa dabua kiroḡa vidarote'e zuni diuḡe'ohe.

³ Zae'a dabua duhuḡa vidarote'e vaseḡa ufeta gubane'ena'a, "Ehoro haba'a manoḡa 'ahao ehoro'i," rae nine, ebu zahara vaseḡa mazao'e, "Ḡa oma edau rado'i ga eḡe oda babaḡano rahao ehoro'i," rae nine,

⁴ za zae'a bare inahotite'ete'e heuḡa ebu zamaze sau'a hina vase kotaze'ete'e heuḡa. A'e za aḡu'ahe?

⁵ Eḡe zamarone nego nabudi, ego'i. Badi'a'a rahao zahara azaḡa ohotadu zeḡe'a fie'ete'e ufeta borofiro. Ebu ze'e Badi'a'a zuhi'azi'ete'e azaḡano ohoziro. A'e ani zamare borofe'ete'e azaḡa teite ḡoitorirote'e ḡoe'a. Za 'ahi aḡu'ahe?

⁶ Rehano za'e zahara azaḡa ovoe ḡiaziro. Zae rana aduga tirote'e zu za ahase onamadu kotao ohozirote'e azaḡa'e iniu? A'e ma'ora azaḡa!

⁷ Zae zinirote'e niḡa ḡihi'aḡa, Iesu Keriso ni rae sausaune'ete'e azaḡa zuni ma'ora azaḡa!

⁸ Buka Zaḡoḡano emeḡe Kini Badi'a'a ohonirote'e goroḡa ḡoe'a ḡihi'a hune'e 'ahi e'e, "Ḡa ḡae bare zamare borofe'ete'e teige, ḡae nego nabudi zamaro'i." Goro ḡoe'a e'e hegote hunine, zae'a haḡae'ete'e haḡaiḡa'e duduḡa.

⁹ Rehano vase nu inahozine, zae haḡai'e sau'a, zu Badi'a goro ḡoe'a idunaḡano za'e goro ḡoe'a varadirote'e azaḡa rae huzi'uma.

¹⁰ Mazaḡa iniu'a Badi'a goro ḡoe'a hegote'ete'e zamaḡano Badi'a goro ḡoe'a tibani mene hegotine, a'e Badi'a goro ḡoe'a nidu'a varade'ete'e teigadu ani'e ve'oḡa rae ra'ohe.

¹¹ Badi'a'a raena'a, "Ubumaze ago ḡezano'i," rae reiro, ebu ani bare, "Vaze ago mano'i," rae reiro. Zae'a ubuma mene ḡezau'ohe rehano, vaze maune, za'e Badi'a goro ḡoe'a varade'ete'e azaḡa ra'ohe.

¹² Badi'a goro ḡoe'ani'a haḡaife sau'anono'o emeḡe bohafe bufe'ohe. Ebu Badi'a'a ane goro ḡoe'a idunaḡano emeḡe kotaḡi'uma. E'ano'o za'e'e zamare'ena'a, faine ḡoero'i zu faine haḡao'i.

¹³ Mazaḡa Badi'a kota madaḡano vaze mene vetuḡazi'ete'e vazeḡa'e Badi'a'a mene vetuḡani'uma. U vaze vetuḡazi'ete'e vazeḡa'e Badi'a'a kotao vetuḡaneadu ḡaboni'uma.

Fie'ena'a Haḡai Manoḡa Haḡao'i

¹⁴ Eḡe nego nabudi, vaze 'ahogani'a raena'a, "E Iesu mazao fie'ohe," rae re'uma. Rehano ani haḡai manoḡa mene haḡaine, naḡi manoḡa hidi'uma? Ani'a fie'ete'e'a ani ḡabonoga'e idaḡahe?

¹⁵ 'Ahi zamare nuro'i. Zae nego 'ahoga ga eze 'ahoga mazao dabuaḡa o'o'a zu mada nidu'a ogomuḡa o'o'a.

¹⁶ Rehano zae bo'aḡano 'ahogani'a ani nina'a, "Badi'a'a manohuga ḡano'i. Dabua hina ahiriḡo gigin'o'i zu ogau idarano'i," rae radu ani ahiri'a ferene'ete'e ḡauḡani 'ahoga mene haune, nagini'e manoḡa?

¹⁷ E'e teige, zae'a fie'ete'e zamaḡano haḡai manōḡa mene haḡaine, zae'a fie'eta'a'e ruga ra'ohe.

¹⁸ Rehano vase 'ahogani'a 'ahige ihi'uma, "Vaze nu'e Keriso mazao fie'ohe, u vase nu'e haḡai manōḡa haḡae'ohe." 'Ougine, e 'ahige naenaeni'uma, "Ḡa'e haḡai manōḡa mene haḡae'ohe rehano, Keriso mazao fie'ohe rae ra'ohe. 'Ougine, ḡae'a fie'eta'a'e nougenouge ihohi'uma? E haḡai manōḡa haḡadu eḡe'a fie'eta'a'e iho'i'uma."

¹⁹ Ga Badi'a'e tibuhuga rae mae ḡihine'ohe. A manōḡa! Rehano vine sau'a zuni e'e mae ḡihinadu rereru'ena'a rihau'ohe.

²⁰ Ḡa, vase kauriḡa! Ḡae'a fie'ete'ea haḡai manōḡa mene haḡaine, ḡae'a fie'eta'a'e huga 'o'o'a. E'e moneo eḡe'a iho'oga urate'ehe?

²¹ Emeḡe vouḡa Aberahamo'e ane ubuga dibu'o fataḡa rana dibu'iro. Ani'a 'ouge haḡairotene Badi'a'a ani'e dudugā rae mae ḡihiniro. Ḡa e'e aḡu'ahe?

²² Aberahamo'e fie'ete'e zu haḡae'ete'e moneo tiburu gauiro. Ḡae'a e'e horone'ohe. Ani'a haḡadu Badi'a mazao hube hune firote'e fur-eraro.

²³ 'Ougadu Buka Zaḡoḡano 'ahige rae reirote'e'a hudaro, "Aberahamo'a Badi'a mazao firo. E'e u'ano, Badi'a'a ani'e vase dudugā rae huniro."✧ Ebu Badi'a'a ani'e Badi'a nabuga rae huniro.

²⁴ Za edeḡa, vase'e mene zeḡe'a fie'ete'e u'ano da'o, rehano haḡai manōḡa zuni haḡae'ete'e

✧ 2:23 2:23 Ḡadaheḡa 15:6

u'ano Badi'a'a ze'e duduḡa rae huze'ohe.

²⁵ E'e teige, daro fu'a roḡaeḡa niḡa Rahaba zuni haḡai manōḡa haḡadu Badi'a'a ani'e duduḡa rae huniro. Rahaba'e ane ne Ieriko rihirihrote'e Isaraela azaḡa mae zouzadu ibi 'ahogano tuḡuze buziro.

²⁶ Eme vinefe'a ahiriono'o buau'etene, ahiri'e ruga. E'e teige, eme'a fie'ete'ea haḡai manōḡa mene haḡaine, eme'a fie'eta'a'e ruga re'uma.

3

Faine Zamaradu Ḡoero'i

¹ Eḡe nego nabudi, zae bo'aḡano ḡehaḡa'e Badi'a ḡoere ihoze'ete'e azaḡano rouga ago urato'i. Mazaḡa za edeḡa, eme, Badi'a ḡoere ihoze'ete'e azaḡa'e Badi'a'a ufeta riḡa kotafi'uma.

² Emeḡe nidu'a ve'oḡa ḡehaḡa haḡae'ohe. Iniu'a ane ḡoereo ve'oḡa 'ahoga o'o'a reine, ani'e ve'oḡani 'ahoga o'o'a vazēḡa ra'ohe, ebu ahi'a nidu'a duduḡano zuhi'anoga zuni idaḡa.

³ Eme hosi'a emeḡe ura da'o haḡaoga uratadu auri kome'a hebe'ano aute'ohe. 'Ouge haḡadu hosi ahiri nidu'a emeḡe'a tutune ragavoga'e idaḡa.

⁴ Ebu ḡasi boro ḡiano'i. Ani'e boro багаḡa zu zavara boro'a ani riḡa duine'e rehano, reva kome'a fase hina ibitohanadu ḡasi vazēḡani'a ane urao onamihi ra'ete'e haba'a reve oname'ohe.

⁵ E'e teige, mazane zuni ahiri nidu'a bo'aḡano kome'a fase rehano, ani'a sau'a borofe furene'ohe.*

Ḡiano'i. Ire roga duhuḡa komeḡani'a butu boro bagaḡa kode hauḡe'ohe.

⁶ Mazane zuni ire roga heuḡa zu sau'ani'a iri'avirote'e haba'a heuḡa. A'e ahiri i'aḡa 'ahoga, rehano ahiri nidu'a torane'ohe. Ire roga teige, mazane'a vaze ḡabone nidu'a ruine'ohe, ebu a'e radiu tuḡutuḡu ire rogaono'o buarote'e ire rogaḡa heuḡa.

⁷ Butu maniḡa, nini, dare'ete'e ḡauḡa zu davara ḡauḡa—'uguḡa nidu'a'e vaze'a ihozadu vaze ago egozenoga'e idaḡa ebu vaze'a 'ouge haḡairo.

⁸ Rehano vazeni 'ahogani'a mazane dudunoga'e mene idaḡa. Mazane'e mada nidu'a sau'a haḡaogano mene fuḡone'ohe zu Zarama'a vaze vihoze ruze'ete'e teige, mazaneo vaze zimi'ete'e sau'aḡani'a iri'ave'ohe.

⁹ Eme'a mazanefe hina Zuhi'a Boro, emeḡe Mama nigune'ohe. Ebu mazanefe hina, Badi'a'a iraḡa teige haḡairote'e azaḡa zina'a, "Radiu tuḡutuḡu adugaḡa hido'i," rae sausaufe'ohe.

¹⁰ Eme hebe tiba hina Badi'a nigune'ohe zu vaze mazao, "Aduga zeno'i," rae sausaufe'ohe. Eḡe nego nabudi, 'uguḡa ago haḡao'i.

¹¹ Idu vuḡa tibaono'o vu manoga zu vu agi'ani'a tiburu sore buanoga'e idaḡahe?

¹² Eḡe nego nabudi, figi ireḡa ranao olivi hugani'a enoga'e idaḡahe? Ga vaini ireḡa ranao

* 3:5 3:5 ani'a gau boro haḡae'ohe rae ane'a bare nigune'ohe.

figi hugani'a rogoga'e idağahe? E'e teige, idu vuğa damağeta mazaono'o vu manoga'ni'a sore buanoga'e mene idağa.

Adureono'o Arirote'e Zamaroneğa Huhuzağa

¹³ Zae bo'ağano iniu'e huhuzağa zu faine zamarote'ete'e vazega? Ani'e hağai manoga hağadu ane ġabone manoga ihofo huni'uma, zu zamarone huhuzağa hina vase mazao roğeru'ena'a hağai'uma.

¹⁴ Rehano zae zamao ahiahi zu zae ura da'o hağaihi rae ra'ete'e zamaroneğa mo'idene, za zae'a bare vase huhuzağa rae ago niguzo'i. Za 'ouge niguzine, ġoere huga o'one'ohe.

¹⁵ Zamarone 'uguğa'e mene adureono'o meirote'e zamaroneğa huhuzağa, rehano raha mone zu mene vine mone ebu Diabolo mone ra'ohe.

¹⁶ Ahiahi azağa zu zeğe ura da'o hağaihi rae ra'ete'e azağa habao'e hağae tauğitaugoga zu hağai sau'a nunu'a fureru'ohe.

¹⁷ Rehano adureono'o meirote'e zamaroneğa huhuzağa'e 'ahiguğa: A'e ibite geno deheğa hune. E'e ġaruna'e uniho manoga, vase mazao manoga hağaoga, vase ġoere egoga, vetuğazoga zu hağai manoga hağaogani'a iri'avoga, vase mazao mene inahoga ebu mene zama guhi ra'ohe.

¹⁸ Uniho manoga hağae'ete'e azağa'e uniho manoga ezoneğa vase bo'ağano ġorau'ohe ebu hena zeğe nidu'a hağai duduğa huga hirive'ohe.

4

Badi'a Uhiḡa Onamo'i

¹ Nougadu zae bo'aḡano utito zu ta'irotitogani'a fureru'ohe? A'e mazaḡa za ahirize ura haḡaihi rae urate'ohe. Zae ahiri ura 'uguḡa'e zae bo'aḡano Badi'a ura haḡaihi rae ra'ete'e teite utite'ohe.

² Za ḡau nu meihi rae urate'e rehano, mene idaḡa reine, vase mau'ohe. Za vase ḡau horonadu meihi ra'e rehano, mene idaḡa reine, ta'irotite'ohe zu utite'ohe. Za'e Badi'a mene umine'e 'ahine, urate'ete'e ḡauḡa'e mene hide'ohe.

³ Za'e Badi'a umine'e rehano, mene hide'eta'a'e mazaḡa zae matu'u veize ve'one umine'ohe.

⁴ Zamaze nidu'a hina Badi'a mazao mene fie'ete'e azaḡa, za aḡu'ahe? Raha 'ahi haḡaiḡa sau'a teite unihoga'e Badi'a agirohau'ohe. E'ano'o iniu raha 'ahi haḡaiḡa sau'a teite unihihi rae ra'ete'e vaseḡa'e Badi'a agire vaseḡa.

⁵ Buka Zaḡoḡano 'ahige ra'ohe, "Badi'a'a emeḡe zamao ane Vine tuḡuniro. Badi'a'e ane Vine'a danafadu eme'a Badi'a da'o zamaroga ufeta urate hune'ohe." Ḡoere a'e huga o'o'a rae zamare'ehe?

⁶ Rehano Badi'a'a emeḡe mazao manoḡa ufeta furene'ohe. E'ano'o Buka Zaḡoḡano 'ahige ra'ohe,

"Iniu nize mae ite'ete'e azaḡa'e Badi'a'a heza-hozini'ohe,

rehano iniu nize mae ovoe'ete'e azaḡa mazao manoḡa furene'ohe."☆

⁷ E'ano'o Badi'a egohano'i. Diabolo agirohano'i, 'ouguine ani zae mazaono'o fera'uma.

⁸ Badi'a uhiḡa onamo'i, 'ouguine ani'a zae uhiḡa ari'uma. Haḡai sau'a azaḡa, 'evoreze vuzu'o'i. Zama aheu azaḡa, zamaze dehenoi'i.

⁹ Haḡaize sau'a u'ano zamaze aro'i zu niau ḡoinaho'i. Eḡofo'e nio ḡihuno'i zu matu'u'e zama adugano ḡihuno'i.

¹⁰ Badi'a ubumao zae'a bare nize mae ovoro'i, 'ouguine ani'a nize mae iti'uma.

Ago rae Sausautito'i

¹¹ Nego nabudi, za zae'a bare ago rae sausautito'i. Iniu'a ane negoḡa nabuga agire ḡorezine ga kotazine, ani'e Badi'a goro ḡoe'a agire ḡorene'ete'e zu kotane'ete'e heuḡa. Zae'a Badi'a goro ḡoe'a kotane'etene, za'e Badi'a goro ḡoe'a mene hegote'ete'e azaḡa, rehano kotane'ete'e azaḡa ra'ohe.

¹² Badi'a da'o ane goro ḡoe'a rifiro zu vase kotaze'ohe. Ani da'o vase ḡabozoga zu ruizoga'e idaḡa. Za'e vase tauḡi, rehano nougadu zae nego nabudi kotaze'ohe?

Zama mone Gauḡa Ago Niguno'i

¹³ Vaze nu'e 'ahige rae ra'ohe, "Eme izidi ga ohogore ne boro 'ahi ga 'omo onami'uma ebu e'ea muri tiba radiu'ena'a, gau 'ahoga haḡadu hadi hidi'uma." 'Ouge ra'ete'e azaḡa, za eḡe ḡoere ego'i.

¹⁴ Za ohogore nagini'a furera'uma'e agū'a. Ġaboneze'e nagiga? A'e oherebau ġozeġa heuġa. Goze'e oherebau mada tahiġa radadu bare dauġe'ohe.

¹⁵ E'ano'o za'e 'ahige re'uma, “Zuhi'a Boro'a uratine, eme'e ġabode radi'uma ebu gau 'ahi ga 'omo haġai'uma.”

¹⁶ Rehano izidi za'e zae'a nagini haġai'uma rae toġanirote'e gauġa moneo nigune'ohe zu nize mae ite'ohe. Zae'a 'ouge nigune'ete'e ġauġa nidu'a'e sau'a.

¹⁷ E'ano'o iniu'a haġae hunite'e haġaiġa manogā edere'e rehano, mene haġaine, ani'e haġai sau'a haġae'ohe.

5

Ma'ora Azaġa Riġa Iraduguziro

¹ Ma'ora azaġa, za izidi eġe ġoere ego'i. Zae mazao sau'a boro'a furera'uma 'ahine, niau kuano'i.

² Zae ġau ġehaġa'e ruhuraro zu dabuaze'e didirima'a au ho'oho'oniro.

³ Za'a zamaze ununuo godoġirote'e goloġa zu silivaġa'e atenararo. Ġauze manomano atenararote'e u'ano, Badi'a kotao za'e ve'oġa rae fureni'uma ebu ire roġa'a ġau nidu'a iri ruine'ete'e teige, ahirize ruini'uma. Raha 'ahi ġonagano zuni za'e ġau manomano ġehaġa ragateragate godoġiro.

⁴ Ġiano'i. Gau azaġani'a zae mebao hiriviro, rehano za'e gauze naeġa mene ziniro. E'ano'o gau azaġani'a zae mazao ġaniġanau'ohe, ebu

ze'a ḡaniḡanau'eta'a'e Zuhi'a Boro Gigi'aḡa Hune'a egoziniro.

⁵ Za'e rahao 'ada naeḡa boro ḡauḡa nidu'a hoitadu ḡabone manoḡano matu'e radiunu. Za'e aba 'ahoga ahi'a boro teige, ahirize borofiro. Aba ahi'a boro'e vase'a manadu au'ete'e teige, za ruizi'uma.

⁶ Za'e ve'oḡa o'o'a azaḡa mazao ve'oḡa haḡairo rae radu zimiro. Rehano ve'oḡa o'o'a azaḡa'e za mene agiroziro.

Aduḡa Hide'ete'e Zamaḡano Zamaze Obone Gigano'i

⁷ E'ano'o, nego nabudi, aduḡa hide'ete'e zamaḡano zamaze obone gigano'i, onamo Zuhi'a Boro'a ari'uma. Hihi azaḡa'e zamaze obone gigane'ena'a meba 'izema ḡoranogano irugu'a ru'anoga zu 'izema hirivogano irugu'a ru'anoga guhine'ohe. 'Ouge ze zamaze obone gigane'ena'a, meba ogomuḡa manomano hirivoga guhine'ohe.

⁸ Zae zuni 'ouge zamaze obone gigano'i zu zamaze inarano'i, mazaḡa Zuhi'a Boro'a arite'e madaḡani'a haniteha.

⁹ Eḡe nego nabudi, nabudizeta ago maḡuno'i. 'Ougine, Badi'a'a za mene kotazi'uma. Giano'i, kotazite'e vaseḡani'a zae ne ibihetaḡano edau'ohe.

¹⁰ Eḡe nego nabudi, Zuhi'a Boro Badi'a niḡano Badi'a ḡoere irina rae furenrote'e peroveta azaḡa zamaro'i. Ze aduḡa hidirote'e zamaḡano

zamaze obone giganiro. Zae zuni ze hegotadu zege teige, aduga zamaḡano zamaze obone giganio'i.

¹¹ Hube hune, eme edeḡa, aduga zamaḡano zamaze obone giganirote'e azaḡa'e manohuga hide'ohe. Za'e Iobu'a aduga boro zamaḡano nougenouge zamaḡa obone giganirote'e igiro, ebu vesu'u Zuhi'a Boro'a nougenouge ani mazao manoḡa haḡairota'a'e ederiro. Zuhi'a Boro'e vase mazao manoḡa haḡaihi ra'ohe zu vetuḡazi ruze'ohe.

¹² Eḡe nego nabudi, ḡau ufeta boro'e 'ahi e'e: Za ḡoereze ago rinede to'i. Adureo Badi'a niḡano ga rahao vase 'ahoga niḡano ga ḡauni 'ahogano ḡoereze ago rinede to'i. Zae'a nagini haḡai'uma rae ro'idene, 'O'e,' rae tauḡo'i. Ga mene haḡai'uma rae ro'idene, 'Mene,' rae tauḡo'i. 'Ougine, Badi'a'a za'e ve'oḡa rae mene re'uma.

Fie'ena'a Kurano'i

¹³ Zae bo'aḡano iniu'a aduga hide'ohe? Ani'e kurano'i. Iniu'a matu'e'ohe? Ani'e Badi'a nigune'ete'e badaḡa badaho'i.

¹⁴ Zae bo'aḡano iniu'e ugiḡeta? Ani'e ekalesia ibitozi'ete'e azaḡa huzi'uma. Ze'e Zuhi'a Boro niḡano ugi vazega rana olivi dehoroga asi'uma zu ani veize kura'uma.

¹⁵ Fie'ena'a kurau'eta'a'e ugi vazega manohuni'uma, ebu Zuhi'a Boro'a ugiganono'o ani manoni'uma. Ebu ani haḡai sau'a nu haḡairo reine, Zuhi'a Boro'a haḡaiḡa sau'a rae modi'uma.

¹⁶ E'ano'o zae haḡai sau'a rae furenadu ihotito'i ebu kuru hina danatito'i. 'Ougine Zuhi'a

Boro'a zae ugi manohuni'uma. Duduḡa vazegā kuru'e inaraḡeta zu huga manoḡa hide'ohe.

¹⁷ Peroveta vazegā Elia'e emeḡe heuḡa vase tauḡi. Rehano ani irugu'a mene ru'anoga veize inare kurarotene, muri uḡidu zu ḡaha'eta za-maḡano rahao irugu'a mene ru'aro.

¹⁸ Ebu ani bare kurarotene, adureo Badi'a'a irugu owoe tuḡunadu rahao ogomu'a ḡuhuradu hudaro.

¹⁹ Eḡe nego nabudi, zae bo'aḡano iniu'a ḡoere huga mazaono'o faranadu ragavine ebu vase 'ahogani'a ani bare tutune arine,

²⁰ za 'ahi ederi'uma. Iniu'a haḡai sau'a vazegā 'ahoga ibi ve'oḡanono'o bare tutune arine, ani'a haḡai sau'a vazegā 'ouge danane'ete'e u'ano, Badi'a'a haḡai sau'a vazegā vine'e ru-neono'o ḡaboni'uma zu haḡaiḡa sau'a ḡehaḡa rae modi'uma.

Buka Zaḡoḡa Ġoitore Iziga
The New Testament in the Uare language of Papua
New Guinea

Nupela Testamen long tokples Uare long Niugini

copyright © 2017-2024 Wycliffe Bible Translators, Inc.

Language: Uare

Translation by: Wycliffe Bible Translators

Contributor: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

PDF generated using Haiola and XeLaTeX on 11 Aug 2025 from source files dated 11 Aug 2025

c398f744-e34b-525a-a9fe-d04e84ab7b13